

Date – 13/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n Manipur-a Zo hnahtlak Pastor pathum kahhlum an ni hi pawl antih thu sawiin an kalsan chungkuate an tawrhpu takzet tih a sawi.
2. Chief Minister Pu Lalduhoma'n Mizoram sangha tharchhuah a pun theih nan sawrkarin thehtawp a chhuah dawn a ti.
3. UD&PA Minister Pu K. Sapdanga'n Aizawl khawpui hriselna, thianghlamna leh himna tura tui luan kawr mumal zawk siamna tur, 'Mission Urban Drain' a hawng.
4. C.Joseph Vijay-a kaihhruai Tamilaga Vettri Kazhagam (TVK) sawrkar chuan wawiin khan Assembly ah fiahna a paltlang.

<><><>

AMBUSH IN MANIPUR KANGPOKPI

Chief Minister Pu Lalduhoma'n Manipur-a Zo hnahtlak Pastor pathum kahhlum an ni hi pawl antih thu sawiin an kalsan chungkuate an tawrhpu takzet tih a sawi.

Churachanpur atanga Kangpokpi pana Thadou Baptist Association hruaitu, motor pahniha chuangte chu Kangpokpi District an thlen hnu, Kotzim leh Kotlen khaw inkarah kahhlum an ni a. Pastor pathum thite hi Rev Dr Vumthang Sitlhou, Rev Kaigoulun Lhouvum leh Rev Paogoulun Sitlhou te an ni a, mi paliin hliam an tuar baw a ni.

Nagaland Chief Minister Neihphiu Rio Kohhran hruaitute rawng taka thah anni chu a dem thu sawiin pawisawilo in nunna an chan chu pawl atih thu a sawi a, an kalsan tak an chungte a tawrhpu takzet tih a sawi baw.

Mizo National Front pawhin thuchhuah siamin pawikhawihhtuten an phu ang ngei hremna hmu se an duh thu an sawi a, Manipurah boruak tha a awm chhoh mek laia thil duhawm lo tak mai a thleng chu MNF chuan pawl an tih thu sawiin Hliam tuarte chu tha chhuak leh ngei turin duhsakna an hlan a ti a, Manipura Zohnahthlakte inkarah leh hnam hrang hrang inkarah remna tuantling awm se tih chu MNF duh dan a nih thu an sawi.

He inthahna thleng hi Manipur-a Zohnahthlak pawl hrang hrang- Kuki Organization For Human Rights Trust (KOHUR), Kuki Students' Organisation, Kuki Students' Organistation Delhi & NCR, Kuki Inpi Manipur, Kuki-Zo Council, Kuki Baptist Convention, Zomi Students' Federation, Kuki Baptist Convention, Zou Sangnaupang Pawlpi, Kuki Worship Service te bakah Evangelical Fellowship of India te chuan an dem thu an sawi a ni.

<><><>

GOVERNOR

Larsap General (Rtd) Vijay Kumar Singh chuan nimin khan SDGI Global University, Ghaziabad, Uttar Pradesh, Convocation hmasa ber a hmanpui a, zirlaite chu a eng zawnga thlir tur leh hma zawna chona awmte beiseina nen hmachhawn zel turin a fuih.

Larsap chuan SDGI Global University-in Convocation hmasa ber a thleng thei chu lawmawm a tih thu leh chhinchhiah tlak a tih thu sawiin, bul an tan tawhna chu tawpsan mai lova chhawmnung zel turin a fuih a. Convocation hmasa ber hmangtu zirlaite chu dinna nghet tak nei an nih tawh avangin hmun danga an kal darh hunah pawh inrintawkna nei turin a chah a. Beih hram hramna, inthununna, taimakna leh dawhtheihna neia tum sang tak nei tur leh, a eng zawnga thil thlira an hma zawna chona awmte beiseina nena hmachhawn zel turin a fuih a. Zirlai nu leh pate chu an fate an tuina zawnah kal tir tur leh an hlawhtlin ngei theih nana tawiawm tlat thin turin a chah bawk.

Vice Chancellor Prof. Parsanjeet Kumar chuan kalkhawmte lawmna thu a sawi a. He hunah hian SDGI Global University Governing Body member, zirtirtu, zirlai leh nu leh pate an tel a ni.

<><><>

CHIEF MINISTER : FISH FESTIVAL

Chief Minister Pu Lalduhoma'n Mizoram sangha tharchhuah a pun theih nan sawrkarin theihtawp a chhuah a ti a, Sangha dil neituten hlawk zawka an tharchhuah theih nan tunlai thiamna thar ber ber an hman ve a ngai tih a sawi.

Dawrpui Multipurpose Hall-a Mizorama Sangha khawitute intawhkhawmna (Mizoram Fish Farmers' Meet) a hmanpui na ah he thu hi sawiin Pu Lalduhoma chuan Sangha tharchhuah kawngah tan lak a ngaih thu sawiin tharchhuah dahthatna tur Cold Storage pawh mamawh anih avangin sawrkarin a ngaihtuah dawn tih sawiin Sangha tharchhuah a pun theih nan theihtawp chhuah an tum thu a sawi a ni.

Fiseries Minister Pu Lalthansanga pawhin thusawiin, Fisheries department mumal zawka kalpui an tum tih sawiin sangha khawi tanpuina kawngah induhsakna tih tawp an tum thu a sawi a ni.

<><><>

UD&PA MINISTER

UD&PA Minister Pu K. Sapdanga'n Aizawl khawpui hriselna, thianglimna leh himna tura tui luan kawr mumal zawk siamna tur, 'Mission Urban Drain' chu wawiin khan Planning & Programme Implementation Department Conference Hall-ah a tlangzarh.

UD&PA Minister Pu K. Sapdanga chuan Aizawl khawpui chu tlang chhengchhe taka awm anih avang leh tui luankawr mumal awm lohna anih avangin kumtin leimin leh lei tawlh an tuar nasa thin a ti a. Tui luan kawr awm chhunte chu hmun tam takah bawlhhlawhin a hnawh a, ruahtui a tlak hmasaka tuihawk luangliamin khawlai a tih bawlhhlawh thin avangin Mission Urban Drain-in a tum ber chu khawpui himna, thianglimna leh hriselna a ni a ti a, hemi tihhlawhtlinna atan kum 7 chhunga Aizawl khawpui tuam chhuak vek tui luan kawr mumal tak siam tum a nih thu sawiin Mission hlawhtlinna tur chuan UD&PA, DM&R, AMC Corporators-te inkarah thawhhona tha tak awm a pawimawh tih sawiin, Minister chuan Local Council, tlawmngai pawl leh mipuite chu mahni veng theuhva tui luan kawr vawng thianglim tur leh he hna chu kuttling lova thawk lo turin a chah a ni.

Byte: UD&PA Minister Pu K. Sapdanga

He hunah hian UD&PA Director Pu Jacob Lalawmpuia chuan Mission Urban Drain hmalakna tur sawifiahin, khawpui chhunga tui luan kawr awm tawh sa, hmun hrang hranga thlun zawm loh, mumal taka thlun zawm vek tura ruahman a nih thu sawiin tui luan kawr chu chi thumah—Primary (Storm Drain lian), Secondary (Ward-level link drains), leh Tertiary (In bulhnaia tui luan kawr tenau) ah te then an ni a ti a, tui luan kawr thar siam tur chu RCC-a siam tur niin, a remchanna hmun apiangah RCC-a khuh a ni ang a, hei hian mihring ke a kalna tha tak a siam dawn bakah chetsualna lakah a veng dawn tih sawiin GIS-based mapping hmangin Aizawl khawpui hmun hrang hranga tui luanna turte uluk taka zirchian hnuah hna hi thawh a ni dawn tih a sawi a ni.

<><><>

LS MP

Lok Sabha MP Pu Richard Vanlalmangaiha'n sawrkar Department hrang hrang tha taka thawh ho a tul tih sawiin khawtlang hmasawnnan inlungual taka thawk ho zel a pawimawh thu a sawi.

Siaha-a District Development Coordination & Monitoring Committee (DISHA) meeting a hmanpui na ah he thu hi sawiin Pu Richard Vanlalmangaiha chuan DISHA Meeting hlawhtling taka neih thin ani chu lawmawm atih thu sawiin Department tin te thawhhona tha neih a tul thu a sawi a, in bengvar a, in finchhuah zel a tul thu sawiin mipui hmasawanna atan theihtawp chhuah theuh turin a sawi a ni.

Vawiina DISHA Meeting-ah hian Department hrang hrang hnuaiia Sawrkar Laipui Scheme khawihtu ten nikum DISHA meeting hnuhnung bera ruahmana an siam te dinhmun thlir ho a ni a, an hmalak tawhna te bakah harsatna an neih te am sawiho a ni.

<><><>

LESDE MINISTER

LESDE Minister Pu Lalnghinglova Hmar in nitina inhlawhna zawngte leh hna petute awlsam taka an inbiakpawh theihna tura duan, ‘Mizoram Labour Link’ mobile application chu vawiin khan LESDE Auditorium, MINECO ah a tlangzarh.

LESDE Minister chuan khawvel thiamna a thang zel tih sawiin mahni phak tawka insiamrem zel a pawimawh thu a sawi a, Mizoram chu thil tam takah hnufual na a la nei tih sawiin hmasawna ruhrel tam zawk din a tul thu a sawi a, Digital khawvelah an awm tawh avangin Mizorama inhlawhfaten awlsam leh tha zawka hnathawh tur an hmuh theihna tura Mizoram Labour Link hawn a ni thei chu lawmawm a tih thu a sawi a ni.

Byte : LESDE Minister

‘Mizoram Labour Link’ mobile application hi Mizoram Building and Other Construction Workers’ Welfare Board buatsaih a ni a. He app ah hian hna zawnglai (worker) leh a chhawr theitu tur (employer) a inziahluh theih a. He app in a tum ber chu pawnlam mi (middlemen) inrawlhna tih tlem a, hnathawh tur zawnga hmun himlo laia Workers/Labours-te fuankhawmna tihbo leh, nitin inhlawh thinte'n an thawh hlauh dik tak (fair wages) langtlang taka an hmuh theihna tura duan a nih bakah nitin a inhlawhfa thinten hna an zawn / hmuh theihna tur leh hamthatna an dawn theih angte an hriat theihna tura duan a ni a, hmun kilkhawr ber bera awmte tan pawha awlsam taka an hman tangkai theih tura duan a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



RD&A MINISTER

RD Minister Prof Lalnilawma'n Faina leh thianghlimna kawngah tan lak a tul thu sawiin khawtlang hmasawna turin thuneitute leh mipuite tanrual a pawimawh thu a sawi.

Vawiina Lawngtlai District Panchayat Resource Centre a hawna a he thu hi sawiin Prof Lalnilawma chuan District Panchayat Resource Centre chhawr tangkai thiam a pawimawh thu sawiin Faina leh thianghlimna kawnga tan lak a pawimawh thu a sawi a, Bawlhhlawh sawngbawl kawngah thuneitute hmalakna chu mipuite thlawp a tul thu a sawi bawk.

RD Minister hian tukin khan Siaha-a MADC Golden Jubilee Hall ah Rashtriya Gram Swaraj Abhiyan (RGSA) hnuaia Siaha District chhunga Village Council 7 te hnenah Computer set semna hun hman puin khawvel changkanna in a ken tel computer chu thiam tuma tan lak a tul thu a sawi a, kalkhawmte chu hun kaldan ang zela inher rem zel tura chahin Hmasawna tuantling a awm theih nan VC te an pawimawh tih sawiin theihtawp chhuah turin a chah a ni.



TAMIL NADU

C. Joseph Vijay-a kaihhruai Tamilaga Vettri Kazhagam (TVK) sawrkar chuan vawiin khan Assembly ah fiahna a paltlang a. MLA 144 ten TVK sawrkar hi an thlawp a. MLA 22 in an thlawp lo thung a ni.

Sawrkar fiahnaah hian opposition party lian ber DMK chu an chhuak tau a ni. Puan tawh angin Tamil Nadu Assembly inthlan neih zawh takah khan TVK hian seat 108 an la a. Sawrkar siam tura seat mamawh an neih phak loh avangin Governor Rajendra Vishwanath Arlekar chuan Assembly ah sawrkar an siam theih leh theihloh fiah turin a ti a ni.



AIR INDIA

Thlawhna tuialhthei man a to zel avangin Air India chuan rampawna a thlawhna thlawk a ti tlem dawn. Tunhnaiah thlawhna tuialhthei man a san chhoh zel avangin leh thlawhna thlawh kawngah inkhuahkhirhna khauh lehzual siam anih chhoh tak avangin Air India chuan he thutlukna hi a siam a. Kumin June atanga August inkar chhungin rampawna thlawhna thlawkte hi tihtlem a ni a ti a. Heng zingah hian Delhi-Chicago, Mumbai-New York, Delhi-Sanghai, Chennai- Singapore leh thlawhna dang pahnihte a ni.

